

Qamutunut motoorilinnut akitsuutitigut isertitat konto 24.11.11-mi naatsorsuutit kingulliit aallaavigalugit isertitaasut affaasa sinerissami aqqusinigissaanermut aqqusinniornernullu atugassanngorlugit immikkoortinneqartalernissaat sulissutigeqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Anders Olsen, Siumut)

Akissuteqaat

(Aningaasaqarnermut Nunamullu Namminermt Naalakkersuisoq)

Siullermeerneqarnera

Siumup Inatsisartunut ilaasortaataa Anders Olsen soqutiginantumik siunnersuuteqarmat Naalakkersuisut sinnerlugit qutsavigerusuppara. Paasinninnera malillugu siunnersuutip imaraa qamutit motoorillit akileraarutaasigut isertinneqartartut affaasa aqqusinigissaanermut atugassatut Naalakkersuisunit immikkoortinneqarnissaat, aqquserngit tungaasigut suliassarpassuaqarnera pissutigalugu.

Siunnersuuteqartup oqarneratuut kommunit tassaapput illoqarfinni nunaqarfinnilu aqqusinniornissanik aqqusinernillu aserfallatsaaliuinissanik aalajangiisartut.

Kommunit aqqusinniornernut aqqusinernillu aserfallatsaaliuinernut tapiissutinik, ataatsimoortumik tapiissutit aqutigalugit maanna pisarput. Ukioq 2000 tikillugu ataatsimoortumik tapiissutit pillugit isumaqatigiisummi allassimasarpoq, ataatsimoortumik tapiissutit ilaat qanoq amerlatigisut suliassanut taakkununga atorineqartassanersut. Kommuninut tapiissutit ilaasa aalajangersimasunut atugassanngoreerlugit immikkoortinneqartarnerat 2001-imi atorunnaarneqarpoq. Kommunalbestyrelsit aningaasanik kommunit suliassarpassinut atugassanik tullerriaarisussanngornikuupput.

Naalakkersuisut tunngaviumik isumaat tassaavoq, kommunalbestyrelsit tassaasut kommunit suliassaannik tullerriaarisussat. Aamma suliassat kommuninut isumagineqartussat kivitseqataaffiginarlugit nunatta karsiata isertitakinnerulernissaannik kinguneqartussamik aaqqiissuteqarnissaq Naalakkersuisut isumaqatigisinnaanngilaat. Imaattariaqanngilarmi kommunit suliassanut tamatumunnga akissuaffiannik arsaarneqassasut.

Naalakkersuisut isumaqarluinnarput akileraarutinik akitsuutinillu suliassanut aalajangersimasunut atugassanngortitsisarneq sapinngisamik atoraveersaarneqartariaqartoq. Suliassanut aalajangersimasunut atugassanngortitsisarneq oqartussaasunut aningaasaliisuusunut kiffaanngissusiiaasarpoq, tamannalu Inatsisartut, Naalakkersuisut allaffeqarfiillu ingerlaavartumik pingaarnersuiisariaqarlutik aningaasanik pigineqartunik atugassiisarneranni imaannaanngitsorujussuuvoq. Isertitassat aalajangersimasunut atugassanngortinneqartarnerat akileraarutit qaffakkiartulernerannik kinguneqarsinnaavoq, oqaatigineqareerpormi aningaasanik suliassanut aalajangersimasunut atugassanngortinneqarsimasunik allanngortitsinissaq ajornakusoortorujussuusinnaavoq.

Taamaattumik Naalakkersuisut isumaqarput aningaasat aqqusinigissaanissamut atorineqartussat kommunit missingersuutaanneereertariaqartut, imaanngitsaq akileraarutit akitsuutillu suliassanut aalajangersimasunut atugassanngortinnerisigut imaluunniit nunatta karsianit tapiissutit amerlinerisigut.

Aqquserngit eqqarsaatigalugit pitsanngorsaasoqartariaqarneranik siunnersuuteqartup isumaa Naalakkersuisut isumaqatigaat.

Taamaammat kommunit ajornartorsiut pillugu oqaloqatigineqartariaqarput. Tamanna sanaartugassat pillugit pilersaarutit kommuninut oqaloqatigiissutigineqarnissaannut ilanngunneqarsinnaavoq, aamma-lu Kanukokap ilaatigut tamannarpiaq pillugu oqaloqatigiissuteqarnissamik kissaateqarneranut atatillugu.

Naalackersuisut taama oqaaseqarlutik siunnersuutip itigartinneqarnissaa inassutigaat.